

# Jonihomi Utipiho Jiho

## Kimandi 1 Jonihopi Utipimandapi Nesipihande

Jisaasihomi otipipatihyaami wo komi ambipati Joniho aimi noaipati apipaahi aungwihondaati kinaungwiha 85-90 A. D. hura utipimo kimo jipatipiyahore. Ko Jonihomi utipiho kapihouni ami ipotihouni naasikura jipatipiyahore. Joniho piwiha wiwa apipaahi watipihaiwa kandaahandi kandi isihyaapi gwinyapenataati bipi napaisaatiha kaundataase. Siyati napaisaatiha jipatipiyati isihiyai kaundati ami kiyaisi, “nisi maasihoyaate,” undati napaisaatiha kaundati ambihundataase. Isihiya usa Jisaasihopi japihi napitaise tiwi windi baiwi gimunyaapi, ami Kopi Autaahaatihomi Mwaahore tiwi windi moniwi gimunyaapihyaare. Aihi kandapi isihiyaisi titihemwati ami piwiha wihoangaaha kaundati jipatipiyahaare.

### 1 Jonihomi Utipiho napimasataise

Jonihomi piwiha namasati katisiha (1:1-4)

Autaahaatiho apipaahi nausoatahore. Nyami usaanini noaipawaati komi mwaayaani matiyaanimatahaawaahi asihatindihandami piwihauni, ami asihatindihandami maipihaiwaisuni ahosumwaitihaawe. Ahosumwaatosaaati Jisaasihoai nuwipinjaati gaahaiwaahihhi kiyaanini kaimi nutihaawe tisiha (1:5–2:29)

Autaahaatihomi mwaaya maatiya gaahaiwa titihihaiwa kiyawaahiya kiyaaami naisihiyai maariho nasisoaari kiyaanihhi nunyami nutaapo. Saisaihi ami Bwaasirihirami mwaaya maatiya maipihaiwa titihimetahaiwa taawi kaimi nowaahiya, ami kiyaaami naisihiyai maariho windi napaitiwi kiyaanihhi nunyami namutaapo tisiha (3:1-24)

Isihyaami piwiha katisaihiha biyaati newaati tipitapaawaati mmondihaaawe, sa piwa Autaahaatihomihhaaro e Bwaasirihiramihaaro, taato tisiha (4:1-6)

Kiraisihomi isihiya sapaapi ami saitihaaawe, tiwi gwinyaapi ami kiya kiyaanihhi gaahireti bimaami nutaatihandapi kaundati osasepihaasiha (4:7–5:21)

### Kima Piwima Asitimatitaatiwihandisahopihare

**1** <sup>1</sup> Aihi Autaahaatihopi siyaho bindataise ta isihiyai nusesipatitandi auta nunjisihopi nini jipatipaindi kasatataato. Iyataati Autaahaatihopi siyahore ta nanyisisiho so isihiya asitimatitawi jinjapihim bimitaatihandisahore. Iyataati so jiji aimaahiho bimainjahore. Isi ko wani auta noaipasihim nyahi aposerihyaanini koai nyami ndihaara usonaati komi piwiha atiwiisaati numwihatahaayo. <sup>2</sup> Iyataati isihiya asitimatitawi jinjapihim bimitaatihandisahore nyami ndiheti ko wani auta noaipasihim nyahi koai biyaati usonahaayo. Iyataati sawaho asitimatitaatiwihandisahosi yamihapataatihim Sapihoaisati maasi konihim bimainjahore auta noaipasihim nyahi koai usonahaawim kandapi nini sangi akitinihi ausaati kasatataato. <sup>3</sup> Ausaati piwima kima kasatohima apaapimaato. Nyahi aposerihyaanini Autaahaatihooisaatuni komi Mwaaho Jisasi Kiraisihooisaatuni maasi maariho naasohitanihim nyami kiyohipatamataiwim napiwim timaamaitisaihi bapiyaati maasi bimitihaawim mmona atisohiwaiwaapi ausaati sangi kasatataato. <sup>4</sup> Iyataati nyami maarititihahandi awaindihandi noaipaitandi utipihandi kimandi sapi jipatipiyataayo.

### Kima Piwima Nyahi Nausainjitihandeti Japepihiritihaahandapihare

<sup>5</sup> Iyataati piwiha kima Autaahaatihomim Mwaahomim kanyatihim atisohiha ami sangi nini sandi kasatitaano, Autaahaatihom so asihatitandihandi apipaahi owehore. Nehi nausainjitihandisahore. <sup>6</sup> Iyataati nyahi sataati, “nyahi maariho naasohim gwinyaawaati Autaahaatihooisaati maasi timaamaitaati naasaindetim bindahaayo,” taati kataatosam maipihaiwam asihatindihandaatihapihaiwam kiyahaawaahim nyami piwiha Autaahaatihooisaati maariho naasohitihim naasaindetim timaamaitaati maasi bindahaayo, taati katohiham jaiwitaati katahaayo. Jaiwita kataatosam sandi nausainjitihandim akitihandetim bimimaawaati asihatindihandaatihim bindahaayo. <sup>7</sup> O Autaahaatihom nausainjitihandetim bimipatamatiyaati nyangisangim kandim nausainjitihandetim japepihirihawaahim isihiyam Jisaasihomim baiwim giwunyaahohiyihiyaisaati maariho naasohitanihim naasikandetim maasi timaamaitito. Iyonihim nyami maipihaiwam nahatewam Autaahaatihomim Mwaahom Jisaasihomim jitipataahim basatim nyamaitaise. <sup>8</sup> Iyaati nyahi sataati, “maipihaiwam windim kamaayaahiyaaninim,” taati katahaawaahim sandim nyangim omanjititihim windim biyatim namaanyesipainjihim katahaato. Iyaati amim sandim piwiha akaahaamim tanyaahom Jisaasihooisaati biyaati maasi timaamaamaitihaayo. <sup>9</sup> Isi nyahi nyami maipihaiwaapi, nyahi siyam siyam kiyahaayonim Autaahaatihonim nyepinyamape, undaati ausaasaihaahim Autaahaatihom windim ahosinyamaamaitaise.

Owetitaise. Nehi komi piwiha katirihiri kireti gaahati kanyisati titihi nyami maipihaiwa nahatewa nenyamaitaise. Nenyamahonihi nyahi noaipawaati gaahiyaanini ainahiyihiyaanimatito. <sup>10</sup>O nyahi sataati, nyahi maipihaiwa windi kamaayo, taati katahaawaahi sikandi Autaahaatihomi piwiha isihyaapi nahatiya maipihandisahiye, tati katisihaapi jaiwitatise taati katahaato. Iyataati ami komi piwihaisangi windi biyati omanjititihim kimwaanyamunditaise.

**Kima Piwima Kiraisiho Nyangi Anditinyaihonihi Nyahi  
Autaahaatihomi Maaritirihireti Japepihiritihaahandapihaare**

**2** <sup>1</sup>Nisi isihyaati maariho nasanyohiyihiyaate, sahi maipihaiwa windi kamaitaatiwi nini piwiha kima sangi kasatiti jipatipiyataayo. Isi isihya usa maipihaiwa kaisaihaahi nyami maipihaiwa Autaahaatiho nenyamaitandi gaapunditandihoyaiho Sapihoaisati maasi bindataise. Iyataati so utaaso nini kasatoto Jisasi Kiraisiho titihi ainahihopisato. <sup>2</sup>Iyataati ko Jisaasiho nyami maipihaiwa nenyamaitandi komi jitipati nuhaati napotaise. Iyati ko nyapaahihi napotaamaise. Owetise. Isihya nahatiya yapi nahatewaara bimohiyihiyaami maipihaiwaapimaawi komi jitipati nuhaati napotaise. <sup>3</sup>Isi nyahi Autaahaatihomi piwiha japepihirihaawaahi nyahi siyaati gwinyaito, nini Autaahaatihopi atindi giwunyaataayo, taati biyaati gwinyaito. <sup>4</sup>Iyataati utaaho wo, nini Autaahaatihopi atindi giwunyaatihonine, tati kandaataahi so windi Autaahaatihomi piwiha biyati minjapepihiraho jaiwitati kandaase. Iyataati ami piwiha akaahaami tanyaaho Jisaasihoaisati maasi biyati windi timaamaamaitaho kandaase. <sup>5-6</sup>Iyataati utaaho wo Autaahaatihomi piwiha atisati japepihirataataahi so Autaahaatihoai maariho numwitandihandapi biyati gwinyaitaise. Iyataati utaaho wori, nini Autaahaatihoaisati maasi timaamaititi bindataayo, ndaataahi Jisaasihomi kairihireti japepihirati kiyane. Siyaati kiyahaawaahi Autaahaatihoaisaati maasi timaamaitahaayo, taati gwinyaito.

**Utaaho Wo Isihiyaisi Maariho Nunyataataahi  
So Nausainjitihandeti Bindataate**

<sup>7</sup>Nisi naisihyaati Jisaasihopi giwunyaahohiyihiyaate, nini kimba winihapimba sapi jipatipiyohipimba wanihapa kasatiti jipatipiyataamaayo. Owetise. Jih Jisaasihopi isihya piwiha ausaapi katauhi atiwi aimi nehohipipaare. Iyataati sapa winihapipa wuwaninihi yeyetiwi atisotihaare. Aih sahi aimi atiwi gwinyaapihiyaate. <sup>8</sup>Iyataati Jisaasiho nyangi maariho aungwohandi nanyinyataise. Aih ami sahi maariho naminihauhi asihatindihandi taati owetihimi ami nausainjitihandi taati noaipataati nanyusaatataise. <sup>9</sup>Iyataati utaaho wo, nini Autaahaatihomihireti japepihiriti nausainjitihandeti bindataayo,

tati kandaahandi kandi isihiya Jisaasihopi giwunyaahohiyihiyai maariho biyati namunyataataahi so asihatindihandaatiji konihi bindataate. <sup>10</sup>O utaaho wo isihiya Jisaasihopi gwihunyaahohiyihiyai maariho nunyataataahi utaaho so titihi Autaahaatihomi maaritirihireti akitinihi japepihirati nausainjitihandeti bindataate. Isi koaisi nunjendandihandi nasati nunjenihonihi ko windi kandapi timaamihaitaise. <sup>11</sup>Iyataati utaaho wori isihiya Jisaasihopi gwihunyaahohiyihiyai maariho namunyataataahi so asihatindihandaatiji daayati asihatindihandaatiji bindataate. Siyati asihatindihandaatiji bimihisi asihatindihandi komi ndihai neti namaasasihi daihira nutandihiraapi naharisa niwinataise. <sup>12</sup>Nisi metihonyaate, Jisasi Kiraisihomi otipipati kaindihandaahi ambipataahi Autaahaatihori sami maipihaiwa kiyohiwaiwa nahatewa aimi nesamase. Nesamasihini nini piwiha kima sapi jipatipiyataayo. <sup>13</sup>Aunihyaati maahaami sapiyaati Jisaasihopi utarihandedeti baiwi giwunyaapi bimohiyihiyaate, Utaaho So aimaahiho konihi bimaami nasati wanisangi konihi bimisihopi sahi aimi atiwi gwinyaapihiyaatitihini nini namati piwiha kima sapi jipatipiyataayo. Iyataati sahi wainyi apwainyihiyaate, sahi andititiwi Bwaasirihirisi aimi ipihatiwimihauhi namati nini piwiha kima sapi jipatipiyataayo. <sup>14</sup>Metihonyaate, sahi nyami Apihopi atiwi aimi gwinyaapihiyaate. Aihisi piwiha kima sapi nini namati jipatipiyataayo. Iyataati sahi aunihyaati maahaami sapiyaate, Utaaho So aimaahiho konihi bimaami nasati wanisangi konihi bimisihopi sahi aimi atiwi gwinyaapihiyaate. Aihisi nini namati piwiha kima sapi jipatipiyataayo. Iyataati sahi wainyi apwainyihiyaate, Autaahaatihomi piwiha sami omañititihini aimi kisamwindihisi sahi aimi andititiwi Bwaasirihiri ipihatiwimihauhi nini namati piwiha kima sapi jipatipiyataayo.

### **Kima Piwima Yapipatambihaiwaisi Maariho Namumwitahaawihandapihaare**

<sup>15</sup>Iyataati sahi yapipatambihaiwaisi maariho namunyawise. O utaaho wo saiwa yapipatambihaiwaisi maariho nunyataataahi Autaahaatihoihi maariho ko windi namumwitaise. <sup>16</sup>Iyataati yapipatambihaiwa siyihaiwaare: Ambipatapihaiwaisahihisi maariho aungwohandi nunyohitihanduni kahapaamapipaapi nisihapaimatititowi maariho aungwohandi nunyawisi maaritohitihanduni, isihiya kahapaamapipaapi asaketanihi nyahi noaipawaati kahapaamapipaasini autaahi bindihaawi noaipawaati watipihyaaninimatitihaaowo tiwi giwunyaahotihanduni, saiwa yapipatambihaiwaare. Iyataati saiwa Autaahaatihomihaiwaamaahe. Owetise. Saiwa Bwaasirihiramihaiwaare. <sup>17</sup>Iyataati yapipatuni kahapaamapipa isihiya maariho nunyohipipauni ahoyati owetitaise. Owetanihi isihiya Autaahaatihomihireti japepihirohiihiyaahihisi asiyaimatiwi baiwi jinjapihi bimitaapo.

**Kima Piwima Kiraisihoai Ipihatitihaawo Tiwihiya  
Aimi Noaipahohitihandapihaare**

<sup>18</sup>Metihonyaate, asisiha ipotiha noaipaitandi detindaise. Aihi Isihiyai Japihi Numwaitandi Autaahaatiho Ahiwisihoai utaaho wo ipihatitando taho noaipaitaise tiwi katauhi sahi aimi atiwihiyaate. Satiwi ipihatitando taho noaipaitaise tiwi katotihomi otipipatihiya aimi noaipawaayopo. Aimi noaipawaayowi asisiha ipotiha noaipaitandi aimi detitithe taati gwinyaitihaawe. <sup>19</sup>Iyataati Kiraisihoai ipihatitihaawo tiwihiya nyangi nanyamasi aimi nowaayopo. Isihiya siya nyangi nanyamasi nyohiyimiya titihi nyamihiyaamendaati nanyamasi nowaayopo. O nyamihiyaataawaawaahi nyamataiwi Jisaasihomihireti japepihiriwi bimitaapo. Sandi nyamihiyaamenda nanyamasi nowaayowi sandi nyamihiyaamendaate, taati gwinyaitihaawe. <sup>20</sup>Iyataati Kiraisiho sangi Itipihohi aimi nasamihi samiheti aimi tisaitataise. Aihi Autaahaatihomi kaiwaiwaapiha piwiha akaahaapi aimi gwinyaapihiyaate. <sup>21</sup>Iyataati piwiha akaaha saapi sahi windi gimunyaapihiyaatitihini nini kasatiti jipatipiyataamaayo. Owetise. Sahi piwiha akaaha saapi aimi gwinyaapihiyaate. Iyataati piwiha akaaha saami windi jaiwitihandi namoapaitaise tiwi sahi aimi gwinyaapihiyaate. Aihi kandapi nini sangi jihaati anditisaiwitandi piwiha kima sapi jipatipiyataayo. <sup>22</sup>Utaaho piwiha jaiwita aungwohandi katitandihohi diyaamahore? Utaaho jaiwitati aungwohandi katitandihohi so Jisaasihopi Isihiyai Japihi Numwaitandi Autaahaatiho Ahiwisihomaahore nehihore tati katisihore. Satati katisiho so Autaahaatiho ahiwisihoaisi ipihatindimaitando tati gwinyaasihore. Isi utaaho wo Mwaahoaisi ahosumwataataahi Sapihoaimaawi ahoyati ahosumwataise. <sup>23</sup>Isi isihiya usa Jisaasihopi Autaahaatihomi Mwaahomaahore tiwi katawaawaahi ami Autaahaatihoaisangisatiwi katohiyihiyaami sapihoemaamatitaise. Owetitaise. O isihiya Jisaasihopi Autaahaatihomi Mwaahore tiwi katawaawaahi ami Jisaasihomi Sapiho noaipati kiyaaami Sapihoematitaise.

**Kima Piwima Autaahaatihomi Itipihohi Piwiha  
Akaaha Neti Ginyunyaitandihandapihaare**

<sup>24</sup>Iyataati sahi piwiha jihini wuwanihura atisotiha namaamapi anitiwi isiwatiwise. Saiwi piwiha jihini atisotiha namaamapi anitiwi isiwatawaawaahi Mwaahouni Sapihouni windi namaasamapi anitimi kindarinihi jaiwatitaise. <sup>25</sup>Iyataati sa piwa waapiimaato, nehi kimaapito. Iyataati nyahi biyaati Kopi giwunyaahohiyihiyaanangi asiyaanimataati jinjapihi jinjapihi bimitihaahandi nanyamitandi piwiha aimi katati Sawaho wisasati ahaise. <sup>26</sup>Nini kima piwima sapi jipatipiyohima sangisi jaipisatitaatiwihiyaapi sisaiwihiya noaipapi jaipisatitaapo satiti sangi

ausaati kasatiti jipatipiyataayo. <sup>27</sup>Iyataahandi kandi ami Jisaasiho Itipihomi aimi nasamihi sami omañititihoni konihi bindataise. Konihi bindataati Autaahaatihomi piwiha akaahaapi biyati neti gisunyaitaise. Isi sangisi katiwisasitaatiwihiyaapi gimunyapeniwise. Iyataati Itipihomi neti giwunyaasihi piwiha sahi gwinyaahohiha sa nehiaamaahe, titihoni akaahaare. Isi Itipihomi katisasirihireti japepihiriwi kaiwi Jisaasihoaisawi maasi timaamaitiwise.

**Kima Piwima Nyahi Noaipawaati Autaahaatihomi  
Metihonyaanimataati Wani Bimohitihandapihaare**

<sup>28</sup>Isi nisi metihonyaate, Koaisawi maasi baiwi timaamaitiwise. Saiwi maasi Koaisawi baiwi timaamaitiwi bimambiwi asisiha ipotiheti ko auta nyangisaapihi noaipahonihura nyahi Kopi yaitihaahandi manyitandihandi owetanihi andititaati bitoaito. <sup>29</sup>Iyataati sahi Kiraisihopi titihoni ainahihoe tiwi gwinyaapihiyaate. Isi utaaho wo Autaahaatihomihireti japepihirati titihoni gaahandi kiyonaaraahi so Autaahaatihomi mwaahoematataise tiwi gwinyaapise.

**3** <sup>1</sup>Ese isihyaate, Apiho nyangi maariho aungwohandi nanyinyataise. Nanyinyataati nyangi, “nisi metihonyaate,” nyatataase. Iyataati sandi akite, nyahi aimi noaipawaati komi metihonyaanimatahaayo. Siyaati nyahi noaipawaati Autaahaatihomi metihonyaanimatonihoni isihya yapipatambihiya nyapi, Autaahaatihomi metihonyaare, tiwi baiwi gwinyaapi maanyisonihotimandi apaapimahe, kiya nyami Apiho Autaahaatihopi windi baiwi gimunyaapihiyaataawaawi saiwa kiyaawaayopo. <sup>2</sup>Iyataati naisihyaati Jisaasihopi giwunyaahohiyihyaate, nyahi aimi noaipawaati Autaahaatihomi metihonyaanimatahaayo.

Siyaati Autaahaatihomi metihonyaanimatahaawi ipotihura yamihapataatihoni ninapitiyaati bimitihaawe, taati windi biyaati moniho. Siyaati monihaahandi kandi nyahi aimi siyaati gwinyaahaayo, ipotihura Kiraisiho nyangisaapihi auta noaipahonihura nyahi koai titihoni usonahaawi noaipawaati komatiyaati bimito taati aimi gwinyaawaahiyaanine. <sup>3</sup>Iyataati isihya Jisaasihopi nasati nanyamaahonihoni komatiyaati bimito, tiwi gwinyaahohiyihya kiyaami omañititihoni maipihaiwa ahotiwaiwa tiwihaapi nemapi titihoni gaahiya Kiraisiho titihoni gaaho ainahihoni bimipatamataiwihiya bindawaayopo. <sup>4</sup>Maipihando tiwi ambihitohitimandi sandi Autaahaatihomi winihapipai nemaitandihandapitopo. Isi utaaho wo maipihandi kiyataataahi so Autaahaatihomi winihapipa nemataise. <sup>5</sup>Iyataati Kiraisiho nehi utaahoematati nyami maipihaiwa nenyamaitandi nasataise. Iyataati Kiraisiho so maipihaiwa windi kamaayaho utaaho ainahihore. Aihoni sandapi sahi aimi gwinyaapihiyaate. <sup>6</sup>Isi utaaho wo Kiraisihoaisati timaamaitati maasi bindataataahi so maipihaiwa windi pihitati

kamaitaise. Owetitaise. Iyataati ami utaaho wo maipihaiwa pihitati kiyonaaraahi so Kiraisihopi windi biyati gimunyaati atihomisahondaate, taati gwinyaitihaawe. <sup>7</sup>Iyataati nisi metihonyaate, isihiya usa napiwi sangi sasatitaapo, Autaahaatihomihireti japepihiriwi bindawaawi ami maipihaiwo, tohiwaiwaisangi gaasi ahoyawi kaiwise, satiwi sangi jaiwisatitaawi sahi baiwi jaawo. Utaaho wo maipihaiwa kamaayati titihi gaahaiwa kaisiho so Kiraisihomatiyati titihi gaaho ainahihore.

<sup>8</sup>Iyataati jihi wuwanihura Bwaasirihiri maipihandi namasati kiyataise.

Isi isihiya usa maipihaiwa pihitiwi kiyawaawaahi siya noaipapi Bwaasirihirami mwaayaimatawaayopo. Autaahaatihomi Mwaaho auta nyangisaapihi napindimandi apaapimahe. Bwaasirihirami otipipati maipihaiwa sikaiwa neti nopisasati nemaitandi nasataise.

<sup>9</sup>Iyataati isihiya usa noaipapi Autaahaatihomi metihonyaimatawaahiya maipihaiwa pihitiwi kiyaanihi windi kamaitaapo. Owetitaise.

Sandi apaapimahe, Autaahaatihomihireti aimi newaawe. Iyataati Autaahaatihomi Itipihoraahi isihiya noaipapi wanihiyaimatohiyihiya maipihaiwa kiyaanihi pihitiwi kamaitaapo. Owetitaise. <sup>10</sup>Iyataati Autaahaatihomi metihonyaimatohiyihiya siyaare, Bwaasirihirami metihonyaimatohiyihiya siyaare, taati mmondahaahandi siyate:

Isihiya Autaahaatihomi maaritirihireti minjapepihiriwi ami isihiya Jisaasihopi giwunyaahohiyihiyai maariho baiwi namunyohiyihiya siya Autaahaatihomi mwaayaamahe, taati biya gwinyaitihaawe.

### **Kima Piwima Isihiyaisaati Maariho Titihi**

#### **Biyaati Naminindihaahandapihaare**

<sup>11</sup>Iyataati jihura Jisaasihomi kaiwaiwaapiha piwiha atisawaahuraari piwiha satiwiha aimi atiwihiyaate, nyahi isihiyaisaati maariho naminindihaawo, tiwi piwiha katauhi aimi atiwihiyaate. <sup>12</sup>Iyataati Keniho Bwaasirihiramihiireti japepihirahosi kirami mwaahosi komi saingihoi Aberihoai sawaho tiwataise. Isi komi kaindihandi nyahi newaati kamaitihaawo. Iyataati Keniho komi saingihoi tiwindimandi napaape. Sandi apaapimahe, Autaahaatiho Aberihomi gaarehandapi maaritataati Kenihomi gaarehandapi Autaahaatiho windi maarimitihi mmonataati sandapi apowihhi namati komi saingihoi sawaho tiwamataise. <sup>13</sup>Nisataiwi Jisaasihopi baiwi giwunyaahohiyihiyaate, isihiya yapipatambihiya Jisaasihopi windi baiwi gimunyaapihiya Kenihomi kaipatamataiwi sapi apousonihi sangi naapihaiwa nasamisaihi kandapi sahi yaiwi sami maariho owemaasetane. <sup>14</sup>Iyataati nyahi isihiya usaisaati maariho naminihohitihandaahi siyaati aimi gwinyaahaayo: Isihiya apipaahi kiyaanihi napwitaatiwihandaatihi namasisi nasaati asiyaanimataati bimitihaawihandaatihi aimi bindahaayo, taati aimi gwinyaahaayo. Isi utaaho wo isihiyai maariho windi biyati

namunyataataahi so apipaahi napwitaatiwihandami watipihandaatihi konihi bindataate. <sup>15</sup>Isi utaaho wo isihiyai maariho biyati namunyati isihiyaapi apousataataahi mikandi isihiyai tiwamataise. Iyataati isihiyaisi tiwamasiho so komi asitimatati jinjapihi jinjapihi bimitandihandi apipaahi owehore, tiwi aimi gwinyaapihiyaate. <sup>16</sup>Iyataati Jisaasiho nyangi maariho nanyinyataati nyatatamanati anditinyaiwitandi naanjihandi neti napotaise. Siyati anditinyaiwitandi napwindihandaahi isihiyaisaati maariho naminindihaahandapi aimi gwinyaahaayo. Isi nyangisangi Jisaasiho kaipatamatiyaati naanjihaiwa kiya newa napwitihaawi nyami naisihiya Jisaasihopi giwunyaahohiyihiyai biyaati maariho numwitihaawe. <sup>17</sup>Iyataati utaaho wo ikipipa asaketaho neti utaaho woai usonataati kahapaamapipaapi ko nenoahitanihi bimonihi kopi maariho windi asipimaawisa kahapaamapipa wapa koai namunyaho Autaahaatihoai nini maariho nunyataayo, tati napitita katitaise? Owetitaise. <sup>18</sup>Isi nisi metihonyaate, nehi maahomwaaqapi nyahi jaiwitaahandi isihiyaisi maariho nini nahinyataayo, taati katitihaawimahe. Owetise. Maariho isihiyai nunyahaawaahi titihi akitinihi nyami maarihoatihapimaawi biyaati maariho nunyaati gaahaiwa kawitihaawe.

**Kima Piwima Isihiya Autaahaatihopi Baiwi Giwunyaahohiyihiya  
Autaahaatihomi Ndiheti Windi Yamaitatiwihandapihaare**

<sup>19</sup>Siyaati akitinihi maariho naminahaawaahi, sandi Autaahaatiho Akohomi metihonyaane, taati gwinyaitihaawe. Iyataati Autaahaatihomi ndiheti ami nyami maariho nga winyaititaise. <sup>20</sup>Iyataati kinyi kinyi maarihoatihapi satipi, Autaahaatiho nisi maipihandi windi nemaanimase, tipi pihitipi gwinyaasamaahi Autaahaatiho neti kinyi maariho napaisaatihimaitaise. Iyataati kinyi kiwahoŋi maariho naminihingitihandisi Autaahaatiho nangitipihati aungwohandi maariho nahinyahosi kinyi maariho neti napaisaatihimaitaise. Iyataati Autaahaatiho nahatewaapi gwinyaahore. Gwinyaahosi kinyi maipihaiwaapi aimi nemwaho tati gwinyaahore. <sup>21</sup>Iyataati naisihiyaati nisatawi Jisaasihopi baiwi giwunyaahohiyihiyaate. Sami maipihaiwaapi Autaahaatiho aimi nenyamase, tiwi gwinyaawaawaahi sandi Autaahaatihomi ndiheti windi yamaiwi nga bimitaapo. <sup>22</sup>Isi saiwi windi yamaiwi nga bindawaawi Autaahaatihomi winihapipa japepihiriwi Komi maaritirihireti kaiwi bindawaawi Autaahaatihoaisi wapa naitaatiwi nunjesalhaahi nasamitaise. <sup>23</sup>Iyataati Autaahaatihomi winihapipa nyangi kanyatimbipa kimbaare: Sahi Nisi Maasihiho Jisaasihopi Isihiyaanangi Japihi Nanyamaitandi Autaahaatiho Ahiwisihore, tiwi baiwi gwinyaapise. Aiwi ami isihiya usaisawi maariho naminewise, tati kanyatataase. Iyataati ami Jisaasihoaisangi piwiha kima



ka aimi kanyatisihaare. <sup>24</sup>Isi utaahe wo Autaahaatihomi winihapipa biyati japepahirataataahi, so Autaahaatichoaisati nasisoaari maasi timaamaitati bindataise. Aihi ami Autaahaatichoaisangi maasi nasisoaari koaisatindaise. Iyataati Autaahaatihomi Itipihoni nyangi aimi nanyamisiho sanyataataase: Autaahaaticho sangisatindaise, tati neti ginyunyaataise. Ginyunyaasihi Autaahaaticho nyangisatindaise, taati aimi nyahi gwinyaahaayo.

**Kima Piwima Autaahaatihomi Itipihoni Gaahopuni Ami Itipihoni  
Maipihoni Kiraisihoai Neti Ipihatitandoni Taunyaahopihaare**

**4** <sup>1</sup>Nisi naisihyaati Jisaasihoponi baiwi giwunyaahohiyihyaate, isihya piwiha jaiwitiwiha ausaitaatiwihiya titaahiyihya yapipataapihi taawi daayawaayopo. Isi kiya napiwi sangi sasatitaapo, nyahi Autaahaatihomi Itipihonisaahyaanine, satiwi piwiha kasatisaihi kiyaami piwihaapi akaahaare tiwi keti gimunyaapise. Owetise. Kiyaami omanjititihoni itipihoni bimisihoni Autaahaatihomi numwihihoro e Bwaasirihirami numwihihoro tiwi kiyaami piwaatiwi kiyoheteti jihoni baiwi tipitapaapi mmoniwise. <sup>2</sup>Iyataati isihya usa satiwi, Jisaasihoni so Isihiyai Japihi Numwaitandi Autaahaaticho Ahiwisihoni nehi utaaheomatati nasataise, tiwi katisaihaahi siya Autaahaatihomi Itipihoni Akohoaisawihyaare, tiwi baiwi titihoni gwinyaaitaapo. <sup>3</sup>Iyataati isihya Jisaasihoponi nehi utaaheomatati nasataise, tiwi kamaatisaihaahi siya isihya Autaahaatihomi Itipihonisaawihyaamaahe. Owetise. Itipihoni so woaisawihyaare. Iyataati itipihoni so Kiraisihoai ipihatindimaitandoni, tahomihore. Iyataati utaahe Jisaasihoi ipihatindimaitandoni taho napitaise, tiwi katauhi aimi atisohihomihoni otipipatihya aimi titaahiyihya noaipawaayopo. <sup>4</sup>Nisi metihonyaate, sahi aimi Autaahaatihomihiy aatimatawaayopo. Saiwi Autaahaatihomihyaatimatawaawi isihya piwiha jaiwitiwiha ausaahohiyihiyai aimi ipihatiwimawaayopo. Sandi ipihatiwimahohitimandi apaaraahimaahae, Autaahaatihomihoni Itipihoni sami omanjititihoni bimisimoni yapipatambihyaami omanjititihoni itipihoni bimisihoi nusatipihahosi koraahi ipihatiwimawaayopo. <sup>5</sup>Iyataati isihya piwiha jaiwitiwiha ausaapi katohiyihya yapipatambihyaare. Yapipatambihyaasi kiyaami piwihaisangi ami yapipatambihyaare. Yapipatambihyaasi ami isihya yapipatambihya usa kiyaami piwiha maaritiwi atiwihoni japepahiritaapo. <sup>6</sup>Iyataati nyahihoni Autaahaatihomihyaanine. Isi isihya usa Autaahaatihoponi atiwihoni gwinyaapihiyaahi Autaahaatihomihoni piwiha nyahi kaundisaihi baiwi atinyaitaapo. O isihya usa Autaahaatihomihyaaimaamatihiy a Autaahaatihomihoni piwiha kaundisaihi windi baiwi atihomaanyaitaapo. Saiwa siyati auta noaipahonihoni Autaahaatihomihoni Itipihoni Akohoni piwiha titihoni akaaha biyati neti giwunyaasawihyaaisuni ami itipihoni

yapipatambiho piwiha jaiwitaha neti giwunyaasawihiyaisuni nyahi biyaati tipitapaawaati usondo.

**Isihiyaisi Maariho Numwitaatiwihandami Autaahaatiho Tanyaahore**

<sup>7</sup>Nisi naisihyaati maariho nasinyohiyihyaate, isihiyaisaati maariho namindihaahandi sandi Autaahaatihomi nasahandisi ami nyahi Komi metihonyaani naasikati kiyaati isihiyaisa maariho namindihaawe. Isi utaaho wo isihiyaisi maariho numwitaatiwihireti japepahirati nahateweti kiyataataahi so Autaahaatihomi mwaahoematataise. Iyati ko Autaahaatihopi biyati atisa gwinyaahondaati sandi kiyataise. <sup>8</sup>Utaaho wo isihiyaisi maariho biyati windi namunyataataahi so ami isihiyaisi maariho numwitaatiwihandami Tanyaaho Autaahaatihopi windi biyati monati atihomisahondaate. <sup>9</sup>Iyataati Autaahaatiho sangisi maariho nasanyataayo tati nyangisi nanyisitandi Autaahaatiho komi Mwaaho naasoaisi yapipataapihi natausaasataise, Jisaasihomi kaindahandaahi asiyaanimataati bimitihaahandi nyahi naitihaawi. <sup>10</sup>Iyataati Autaahaatihoaisi nyahi jiji maariho nunyonihi komi Mwaahoaisi nyapi natausaasataamaise. Owetise. Autaahaatiho nyangisi maariho nanyinyataati komi Mwaaho nyami maipihaiwa nahatewa nenyamaitandi natausaasataise. <sup>11</sup>Iyataati nisi naisihyaate, Autaahaatiho siyati maariho aungwohandi nanyinyataise. Isi sandapi nyangisangi isihiya usaisaati maariho namindihaawo. <sup>12</sup>Iyataati utaaho wo Autaahaatihoaisi windi mausose. Isi nyahi Jisaasihomi isihiyaisaati maariho naminihaawaahi Autaahaatiho maasi nyangisatititaise. Iyonihi sandaahi Autaahaatiho isihiyaanangi maariho nanyamindihandi nga biyati nyamiheti noaipati watipindaise. <sup>13</sup>Autaahaatihoaisaati nyahi maasi timaamaitonihini, ami Autaahaatiho maasi nyangisatindaise taati aimi gwinyaahaayo. Siyaati aimi gwinyaahohitimandi apaaraahimaawe, Autaahaatiho komi Itipihoni nanyamisiho neti ginyunyaasihini gwinyaahaayo. <sup>14</sup>Iyataati Sapiho Mwaahoaisi natausaasihini yapipataapihi isihiyaisi japihi numwaitandi napindihandi sandi nyahi aposerihyaanini aimi mmonahaawi namawaati kandapi piwiha nyahi ausaawa isihiyaisi kaunditihahiyaanine. <sup>15</sup>Isi utaaho wo Jisaasihopi Autaahaatihomi mwaahoe, tati katisiho so Autaahaatihoaisati maasi timaamaitati bimihi ami Autaahaatihoaisangi maasi koaisatitithe. <sup>16</sup>Iyataati nyahi Autaahaatihopi nyangisi maariho aungwohandi nanyinyataise, taati gwinyaahaawi Autaahaatihopi nyangisi biyati nyainjaati bimitaise taati giwunyaahaayo. Iyataati Autaahaatiho isihiyaisi maariho numwitaatiwihandami Tanyaahore. Isi utaaho wo isihiyaisaati maariho namindihaahireti japepahirati kaisiho so Autaahaatihoaisati timaamaitati maasi bimihi ami Autaahaatihoaisangi maasi koaisatitithe. <sup>17</sup>Autaahaatiho isihiyaanangi maariho nanyamindihandi nyamiheti noaipati watipindaise. Ipotihura asisiha

ipotiheti isihiyai neti tipitapaahonihura nyahi windi yamaitihaawo. Iyataati sandi apaapimaawe, Jisaasiho komi Sapihoaisi maariho nunyati maasi bimipatamatiyaati nyahi naasikati kiyaati Autaahaatihoai maariho nunyaati maasi bindihaawe. Isi asisiha ipotiheti windi yamaito. <sup>18</sup>Iyataati utaahe wo Autaahaatihoai maariho nunyataaho windi yamaitaise. Iyataati ami utaahe wo isihiyaisi maariho numwitandihandapi biyati nga gwinyapenataataahi komi yaitandihandi apipaahi owetitaise. Iyataati isihiyaami yayohitihandi sandi apaapimaawe, kiyaami maipihaiwa kiyohiwaiwaapi wihooanjihandi naanjihandi newaanipane, tiwi yayawaayopo. Isi utaahe wo Autaahaatihopi naanjihandi nanimitaiso tati yayonaahi so isihiyaisi maariho numwitaatiwihandapi windi biyati namusesipatahondaate. <sup>19</sup>Iyataati maariho Autaahaatihoai nunyohitindi sandi apaapimaawe, Autaahaatiho Sawaho jiji maariho nyangi aungwohandi nanyamindihandape. <sup>20</sup>Iyataati utaahe wo isihiyai usonataahandi kandi biyati maariho kiyaisi namunyaho so ami Autaahaatiho mausosihoaimaawi ahoyati maariho windi namumwitaise. Iyataati ami ko isihiya usaisi maariho windi biyati namunyataahandi kandi, nini Autaahaatihoai maariho nunyataayo, tati kandaataahi so akitinihi titihi kandaamaase. Owetise. Apipaahi jaiwitati kandaase. <sup>21</sup>Iyataati winihapipa Jisaasiho kanyatihi atisohipipa siyahapaare: Utaahe wo Autaahaatihoai maariho nunyataataahi, ami komi naisihiya Kiraisihopi giwunyaahohiyihiyai maawi maariho nunyane, tati kanyatihi atisahaayo.

**Kima Piwima Isihiya Baiwi Giwunyaahohiyihya  
Yapipatambihaiwaisi Ipihatiwimaitatiwihandapihaare**

**5** <sup>1</sup>Isihiya usa Jisaasihopi Isihiyai Japihi Numwaitandi Autaahaatiho Ahiwisihore, tiwi baiwi giwunyaawaawaahi siya Autaahaatihomi metihonyaimatawaayopo. Isi isihiya kiyaami Sapiho Autaahaatihoai maariho nunyawaawaahi ami, Autaahaatihomi metihonyaimatohiyihiyaimaawi ahoyawi maariho numwitaapo. <sup>2</sup>Iyataati Autaahaatihomi metihonyaimatohiyihiyaisi maariho nunyahaayo taati gwinyaahotimandi sandi wipiyihaawi maawe, Autaahaatihoai maariho nunyaati komi piwiha katirihireti japepihiraati kiyahaawi sandi siyaati gwinyaahaayo. <sup>3</sup>Isi nyahi Autaahaatihomi piwiha katisiha atisaati kireti titihi japepihirihaawaahi sandi Autaahaatihoaisi maariho biyaati nunyahaawe. Iyataati ami komi piwiha atisaati japepihirihaawi nyapi windi naahomaanjataise. <sup>4</sup>Siyaati japepihiritihaahandapi nyapi windi naahomaanjindimandi apaapimaawe, nyahi Autaahaatihomi metihonyaanini yapipatambihaiwaisi ipihatisaamahaawe. Yapipatambihaiwaisi ipatisotimandi apaaraahimaawe Autaahaatihopi biyaati giwunyaahotihandaahi ipihatisaamahaayo. <sup>5</sup>Utaahe ninapitiyataaho (giwunyaataaho) yapipatambihaiwaisi ipihatisamaitaise?

Utaaho wo Jisaasihopi Autaahaatihomi Mwaahore tati biyati giwunyaataaho so yapipatambihaiwaiisi nga ipihatisamaitaise.

**Kima Piwima Autaahaatiho Komi Mwaahopi  
Piwiha Ausaati Katindihandapihaare**

<sup>6</sup>Iyataati so Jisasi Kiraisiho napiso waapoho naitandihandapuni ipi titi atawihateti jitipa nuhaitandihandapuni nasataise. Iyataati ko waapoho naitandihandapaahihi nasataamaise. Owetise. Waapoho naitandihandapuni komi jitipati nuhaamaitandihandapuni nasataise. Iyataati Itipiho so piwiha akaahaamihore. Piwiha akaahaamihosi Jisaasihomi kaiwaiwaapi Autaahaatihomi Mwaahosi saiwa kiyataise tati neti ginyunyaitaise. <sup>7-8</sup>Iyataati Jisaasihomi kainyanya mairimaasi siyate: Itipiho nanyamindihanduni, waapoho nesitihanduni, jitipati nuhoaamasitihanduni, sanyaaraahi Jisaasihopi Autaahaatihomi Mwaahoe, taati gwinyaitihaawi Autaahaatiho neti nanyisataise. Sanya kainyimana noaipati timaamaita naasaahi Jisaasihopi Autaahaatihomi Mwaahoe, tati nanyisataise. <sup>9</sup>Iyataati isihiya taahiyihiya wapaapi piwiha naasika katauhaahi akite taati giwunyaawaahiyaanine. Iyataati Autaahaatihomi piwiha ausaati katisiha apipaahi akaahaare. Akaahandaati isihiya taahiyihiya wapaapi akite tiwi katohiwaiwaiisi apipaahi ipihatisamahaare. Isi Autaahaatihomihaapi biyaati gwinyaitihaawe. Iyataati Jisaasilo mairima kainyanyaapi siyahoe siyahoe, tati Autaahaatiho sawaho ausaati kanyatataase. <sup>10</sup>Isi utaaho wo Autaahaatihomi Mwaahopi biyati giwunyaasiho so Autaahaatihomi piwiha katisiha atisataati Jisaasihopi Autaahaatihomi Mwaahore, tati biyati komi maarihoatihapi gwinyaitaise. O utaaho wo Autaahaatihopi biyati gimunyaasiho so ami Autaahaatihomi piwiha Mwaahopi siyahore siyahore tati katisihaapisangi windi biyati gimunyaitaise. Siyati Jisaasihopi Autaahaatihomi Mwaahoe tati biyati gimunyaataataahi sikandi Autaahaatihomi piwiha katisihaapi jaiwitatise tati gwinyaataise. Iyataati ami Autaahaatihopi jaiwititandihore, tati gwinyaitaise. <sup>11</sup>Iyataati Autaahaatiho piwiha akaaha kanyatataati sata kanyatataase, “sahi asiyaatimatiwi jinjapihi jinjapihi bimitaatiwihandi aimi nasinyataayo. Iyataati asiyaatimatiwi jinjapihi jinjapihi bimitaatiwihandami tanyaaho Nisi Maasihihore,” tati Autaahaatiho aimi kanyatataase. <sup>12</sup>Isi utaaho wo Autaahaatihomi Mwaahoaisati biyati maasi timaamaitataataahi so asiyaatimatiwi jinjapihi jinjapihi bimitaatiwihandi aimi netaise. O utaaho wo Autaahaatihomi Mwaahoaisati windi biyati timaamaamaitataataahi asiyaatimatiwi jinjapihi jinjapihi bimitaatiwihandi windi namaitaise.

**Kima Piwima Nyahi Asiyaanimataati Jinjapihi Jinjapihi  
Bimitihaahandisahiyaanine Taati Gwinyaitihaahandapihaare**

<sup>13</sup>Piwima kima nini jipatipiyohima sahi Autaahaatihomi Mwaahopi baiwi giwunyaahohiyihyaatapi jipatipiyataayo. Kima piwima sapi

jipatipiyohima apaapimaahē, asiyaatimatiwi jinjapihi jinjapihi bimitaatiwihandapi aimi nehaayo, tiwi baiwi gwinyaitaatiwi sangi kasatiti jipatipiyataayo. <sup>14</sup>Iyataati nyahi wapaapi Autaahaatihoai nunjesaihaahi atinysisati sapa numwitaano, tati maaritimbipa nanyamitaise, taati aimi gwinyaahaayo. Isi Autaahaatihopi yamaayaati nanihiyaati komi deti nowaati kahapaamapipaapi nunjendihaawe. <sup>15</sup>Iyataati nyahi Autaahaatihoai wapaapi nunjehonihi biyati atinyindihandapi aimi biyaati gwinyaawaahiyaanine. Siyaati gwinyaahaawi Autaahaatihoai wapaapi nanyinye, undaati nunjesaihaahi ami nanyamitaise, taati aimi gwinyaawaahiyaanine. <sup>16</sup>Iyataati Kiraisihomi utaaho wo maipihandi kiyonihi ami Kiraisihomi utaaho wo koaisi usonataati, komi maipi handi Autaahaatiho nemwahonihi ko windi yaawati naanjihandi ipotihura namaitaiso, tati gwinyaataataahi gaasi utaaso usosiho namati Autaahaatihopi gaapundane. Gaapundonihi Autaahaatiho komi maipihandi nemwati japihi numwaati koai asohoemati jinjapihi jinjapihi bimitaatiwihandi numwitando. Iyataati isihiya maipihaiwa kaiwa kaiwa kaisaihihaiwa Autaahaatiho nemwaitandihaiwaapi nini sangi kasatataato. Iyataahandi kandi utaaho wo Autaahaatiho winja bimindihandisi ahosumwati noti maipihaiwa pihititi japihi japihi kiyonaaraahi komi maipihaiwa saiwa Autaahaatiho windi nemwaamaitaise. Nemwaamahonihi kandinihi ahotimi noti napotaahura yaawati naanjihandi naitaise. Isi siyati maipihaiwa nasisoaari kiyatoaatisihopi windi gaapimundiwise ndaato. <sup>17</sup>Autaahaatiho maarimitirihireti japepihiriwi kiyohiwaiwa saiwa maipihaiwaare. Iyataati utaaho sami wo komi maipihaiwaapi Autaahaatihoai nepinimape undihi Autaahaatiho nemwasiwaiwaapi ipotihura yaawati naanjihandi windi namaitaise. Isi isihiyai maipihaiwa kiyohiyihiyaapi gaapunditahaawe. <sup>18</sup>Iyataati isihiya noaipapi Autaahaatihomi metihonyaimatohiyihiya Bwaasirihiramihireti minjapepihirawaayopo. Bwaasirihiramihireti minjapepihirotimandi apaapimaahē, Autaahaatihomi Mwaaho kiyai biyati iwinjaati bimihe. Aihi Bwaasirihiri kiyaisi nasati namumwihatataise, taati saiwaapi aimi gwinyaawaahiyaanine. <sup>19</sup>Iyataati nyahi siyaati aimi gwinyaahaayo, nyahi noaipawaati Autaahaatihomi metihonyaanimatohiyihiyaanini komi otitihimonihi, ami isihiya Bwaasirihiramihireti japepihirohihiya Bwaasirihiri winjaati bimihiri kirami otitihimonihi bindawaayopo, taati aimi gwinyaahaayo. <sup>20</sup>Iyataati nyahi aimi siyaati gwinyaahaayo, Autaahaatihomi Mwaaho aimi nasati mmona gwinyaitihaahandi nyangi nanyinyataise. Aihi nyahi Autaahaatiho akitihopi mmonaati aimi gwinyaahaayo. Isi nyahi komi Mwaaho Jisasi Kiraisihoaisaati maasi timaamaitihaawaahi mikandi Autaahaatihoaisaati maasi maariho naasohitihimonihi timaamaitihaayo. Iyataati Autaahaatiho nyahi maasi

timaamaitaati bimohimo so apipaahi Akitihore. Iyataati Autaahaatiho so jinjapihi jinjapihi bimitaatiwihandisahore, taati aimi gwinyaahaayo.

<sup>21</sup>Isi nisi metihonyaate, autaahaatiho jaiwitiwiho taahihomihaiwaisi baiwinihi ahosumwapise. Iyataati maipihaiwa wiwa sangisaapihi noaipaitaisi sahi baiwi jaawo satiti nini Jonihonini ausaati kasatiti jipatipiyataayo.